

Mors uero quæ ui, & non naturæ lege infertur, contingit cum loco mortis utraq; infortunæ dominabuntur, aut ambæ in ipso eodem loco, uel eius aspectu quadrato, uel opposito permaneant, aut ex eo cum qualibet infortunarum dominium, & potestatem super locum Solis, & Lunæ, uel super ambo luminaria, & Hylech similiter habuerint.

Mors autem mala & iniqua propter duarum infortunarum coniunctionem continget, eiusq; magnitudo per luminarium testimonia proueniet.

Naturam etiam signorum in quibus stant interfectores, nec non radios eorundem ad locum mortis indicem inspiciemus: Secundum enim horum uictoriam, qualitas mortis ueniet.

Saturnus si in quadrato Solis, uel in ipsius opposito fuerit in contrario Hayz ipse abscondens Hylech, si fuerit in signo fixo, manu populi lapidante mortis interitu opprimetur, uel strangulatione suspendetur, pœnis uero mortiferis ex hac luce migrabit. Cumq; Saturnus occidentalis fuerit, & cum Luna sequatur, idem euenire non ignoremus. At cum in signis quarum figuræ ferarum figuris assimulantur extiterit, ferarum morsibus interibit. At si Iupiter Saturno testificetur, & infortunatus existat, in conuentu uirorum die nota & solemnè, ferarum morsui damnatus obijcietur. Quod si ipse Saturnus mortis dominus, fuerit in opposito alterius luminaris in ascendente existentis, uel in alio angulo, in carcere in periculum uitæ ueniet. Et si Mercurius eidem in figura coniungatur, maxime autem in signis serpentium cœlestis spheræ, uel in signis quorum figuræ sunt ferarum rapacium, uenenosorum animalium morsibus peribit. Si autem Venus cum eis fuerit, potu mortifero, fraude mulieris interibit. Quod si in Virgine uel Piscibus, aut in signis humidis sibi locum uendicauerit, Lunæq; in figura associetur, uitam in aquis finiet. Et si in nauis fuerit tempestuosa fluctuatione maris uita priuabitur. Et si in aliquo signorum solstitialis, uel in signis quadrupedum cum Sole fuerit, seu in Martis opposito uice Solis remanserit, ruinæ casu perimetur. Si autem in Medio cœli, uel in eius opposito fuerit, ex alto præcipitabitur, & morietur. Omnia iam dicta conferuntur ad Saturnum, cum respexerit luminaria, & interfectores fuerit.

Iam uero qua morte natus periturus sit, Marte interfectore existente in Hayz contrario, & Solem ac Lunam ex quadrato uel opposito respiciente determinabimus. Si in humanæ formæ signo rotauerit, propter seditiones, & altercationes, inter suos consanguineos contingentes, seu bellando, capite truncabitur, uel sibi mortem manu propria causa mulieris consciscet, aut mulieris manibus interficietur. Istud autem eueniet, cum Venus ipsi testificabitur. Et si Mercurius habuerit participationem cum Saturno in figura, latronum, pyratarum, uel insidiatorum manibus dilacerabitur. At si in signis abscissis fuerit, scilicet in Tauro, Geminis, uel cum Algol, abscissione capitis, uel membrorum morietur. Et si Mars in scorpione, uel Tauro fuerit, combustione aut perforatione membrorum, aut medicorum incisione, uel spasmo finis uitæ eidem imminet. Et si Mars in Medio cœli, uel in opposito eius permanserit, in cruce suspendetur, maxime si cum Andromeda fuerit. Quod si in signo occidentali, aut in ascendente locum habuerit Mars, uiuus igne cremabitur. Et si in figuris quadrupedibus extiterit, cadendo morietur. Si uero Iupiter Marti testificetur & infortunatus Iupiter existat, ira potestatis uel regis, mortem manifestam subibit. Quod si utraq; infortunæ Saturnus cum Marte iungatur uel alter alteri opponatur, quemadmodum prædiximus, ut mortis scilicet sint occasio, malam uitalis spiritus priuationem augebunt. Dominus autem qualitatis mortis, est dominus loci interficientis.

Cum duæ infortunæ in loco interficiente potestatem habuerint, accidentia prædicta in quantitate ac qualitate multiplicabuntur, tales quoq; non sepelientur, sed